

Euskal taldeak 1998ko
arraun denboraldian

Arkote, Bizkaiko txapelaren bila



Aurten traineru lehiakorra lortu du Plentziako Arkotek.

RAMON BASALDUA

Bizkaiko talderik zaharrenetako dugu Plentziako Arkote. Arraun talde honek garrantzi handia ematen dio behe mailetako lanari, eta urtero Arkoteko batelak onenen artean izaten dira Bizkaiko eta Euskadiko txapelketetan, gizonezkoetan zein emakumezkoetan. Plentziarrekin denboraldi bikaina egin zuten iaz, eta Bizkaiko txapelketan domina lortzeaz gain euskal ligarako txartela eskuratu zuten. Gainera, onenekin izan zituzten estropadetan maila polita erakutsi zuten. Gauzak horrela, iaz izandako gorakada egiaztatu nahi dute Pedro Mari Abandoren mutilek. «Denboraldi garrantzitsua izango da Arkoterentzat. Aurreko denboraldian izan genuen igoera egiaztatu behar dugu. Horixe da gure helburu nagusia. Horretan ari gara. Une

honetan ez gaude oso indartsu, baina uztailaren amaierarako puntuan izango gara», diote Arkotekoek. Esan beharra dago Arkotek estreinaldi makala eman ziola denboraldiari. Pedro Mari Abandoren mutilek bederatzigarren bukatu zuten Elantxobeko Ikurrinean, eta Bizkaiko lau talde izan ziren haien aurretik. Larunbatean Getxon jokatu den Dalia Saria azterketa garrantzitsua izango da plentziarren-tzat.

Bizkaiko dozena erdi talderi gertatzen zaiena gertatzen zaio aurten Arkoteri. Azken urteotan Bizkaian nagusi izan zen Ondarroako trainerua barik, inoiz baino luzeagoa da Bizkaiko txapela eskuratzeko hautagaien zerrenda. Pedro Mari Abandok zuzentzen duen Plentzitarrak hirugarren postua lortu zuen joan den urtean Bizkaiko txapelketan

Pedro Mari Abando:
«Aurreko denboraldian izan genuen gorakada egiaztatu behar dugu aurten»

Ondarroa eta Areetako Raspasen atzetik. Esan bezala, aurten Ondarroak ez du trainerurik, eta Raspasek bat egin behar izan du Algortarekin trainerua atera ahal izateko. Horrenbestez, Plentziakoek ez dute galdu nahi Bizkaiko Txapelketa estreinakoz lortzeko aukera. Hasteko eta behin, Bizkaiko txapelketa Bermeoko badien izango da, itsaso zabalean, eta Pedro Mari Abandoren mutilak ederto aritzen dira olatu artean. Hori dute aldeko beraz.

◆ **Pedro Mari Abando** ◆ Arkoteko entrenatzailea

«Abantaila gutxi eskaintzen du ligak»

PEDRO MARI ABANDOK urte asko daramatza lanean arraunen munduan. Ondo baino hobeto daki Arkotek inoiz baino aukera handiagoa duela Bizkaian gaiturrera iristeko. Abandoren ustez, euskal liga ez da erakargarria.

■ **Ez zara egongo pozik Elantxobeko Ikurrinean egindako estropadarekin, ezta?**

Ez. Denboraldiko lehen estropada izan zen. Hilabete parean eman genuen lehiaketetan aritu barik, eta arraunlariek igarri egin zuten. Gainera, nabaritu zen jendea ez dagoela sasoi onean. Testa egiteko asmoz joan ginen, eta

gauzak ez ziren guk espero bezain ondo atera. Hemendik aurrera sasoi hartzen joango gara.

■ **Zer deritzozu bizkaitarren arteko euskal ligarako sailkatze estropada Bilboko errekan jokatzeari?**

Kontraesan nabaria da. Bost estropadak osatzen dute euskal liga, eta guztiak itsasoan jokatu dira. Adibidez, Kontxako estropada itsasoan egiten da, eta bertan parte hartzeko sailkatze estropada ez da Urumean egiten, itsasoan baino. Gure ustez badaude leku aproposagoak bizkaitarren arteko kanporaketa

egiteko. Gainera, estropada hori Deustuan jokatu da marea behean dagoela. Ur gutxi egongo da, eta estropada eremuko baldintzak kaltegarriak dira guretzat eta beste talde askorentzat.

■ **Bizkaiko Txapelketa da denboraldiko estropadarik garrantzitsuen bizkaitarrentzat, eta estropada hori itsasoan jokatu da, Bermeoko badien hain zuzen.**

Talde batzuk gustura aritzen gara itsasoan. Gainera, Bermeoko eremua aproposa da arraunerako. Irailean egiten den estropada ederra izaten da benetan.

ARKOTE

Patroia

Juan Carlos Gernika

Sortze urtea

1949

Entrenatzailea

Pedro Mari Abando

Kolorea

Horia eta beltza

Lehendakaria

Jose Bergaretxe

Trainerua

Plentzitarra

Herria

Plentzia

► Arraunlariak

	Altuera	Pisua	Adina	Urteak traineruan	Nongoa
Juan Fernandez	1.83	90	24	1	Plentzia
Andoni Diaz	1.87	89	28	4	Plentzia
Raul Amundarain	1.68	65	28	10	Plentzia
Eleder Gurpegi	1.84	82	22	3	Sopela
Eneko Van Horenbeke	1.85	81	19	3	Getxo
Txomin Blanco	1.78	80	20	3	Gorliz
Iker Perez	1.80	88	20	3	Sopela
Jose Roberto Bilbao	1.86	90	28	10	Plentzia
Xabi Arana	1.77	76	20	7	Plentzia
Unai Altonaga	1.83	82	24	10	Plentzia
Juanma Hidalgo	1.85	82	20	7	Barrika
Jon Elortegi	1.80	83	20	7	Barrika
Jon Gonzalez	1.82	78	19	3	Gorliz
Igor De Diego	1.82	95	21	7	Basauri
Ivan Gandul	1.77	72	23	3	Basauri
Kepa Aginaga	1.77	70	19	2	Plentzia
Igor Larraona	1.87	89	21	4	Algorta
Joseba Viana	1.76	78	24	1	Bilbo
Alvaro Bergaretxe	1.82	91	20	7	Plentzia
Beñat Astelarra	1.87	85	20	7	Plentzia
Borja Viadero	1.84	78	18	7	Plentzia


► Aurreko denboraldiko emaitzak

- **Bigarren postuak:** Plentziako Ikurrina, Portugaleteko Ikurrina, Lekeitioiko Ikurrina eta Bizkaiko Ligako estropada.
- **Hirugarren postuak:** Elantxobeko Ikurrina eta Bizkaiko Txapelketa.
- **Bosgarren postuak:** Dalia Saria, Santurtziko Ikurrina eta Getxoko Ikurrina

Arkotek inoiz baino garrantzi handiagoa eman dio traineru denboraldiari. Beste urte batzuetan ez bezala, traineru lehiakorra du, iaz Amilibia untzigile oriotarrari erosi ziona. Gainera, iaz Plentzitarran aritutako arraunlariek jarraitu egiten dute klubean. Esan beharrik ez dago blokea mantentzea oso garrantzitsua dela talde batek aurrera egin dezan. Gainera, aurten Arkote inoiz baino gutxiago aritu zen traineriletan. Bestela esan,

Plentziakoek traineruaren aldeko apustu handia egin dute. Bertakoek gogoan dute 1989. urtean egin zuten denboraldi bikaina. Orduan, Kontxan sartzeko zorian izan ziren, zortzigarren bukatu baitzuten sailkatze estropadan Santurtziren atzetik. Soterak, orduko hartan, lau segundo baino ez zizkion kendu Arkoteri.

Ramon Basaldúa
BILBO



■ **Hautagai ugari daude aurten Bizkaiko txapela eskuratzeko**
Ez dago batere argi zein den nagusi. Oraingo, behintzat, ez

dut inor ikusten inoren gainetik. Aurreko denboraldian Bizkaian puntan izan ginenon artean izango da lehia. Iaz bigarren izan ginen Bizkaiko txapelketan, eta aurten txapela eskuratzeko gauza handia izango litzateke guretzat. Lehenengo hiruretan sartzea ere ez litzateke txarra.

■ **Eta euskal liga zer?**

Egia esateko ez daukagu oso garbi zein abantaila duen euskal ligan parte hartzeak. Esan beharrik ez dago badirela gu baino indartsuagoak diren beste traineru batzuk, eta guretzat interesgarriagoa izan daiteke beste estropada batzuetara joatea, garaipena lortzeko aukera izango genukeelako. Telebista kenduta, abantaila gutxi du euskal ligak.